



Nuuk, 8. august 2014

UKA 2014/45

Inatsisartut Suleriaasianni § 36 naapertorlugu apeqquteqaat aallaavigalugu oqallisissiamik imaattumik saqqummiussaqaarpunga:

**Aktieselskabit pisortat pigisaasa iluanaarutaannik piffissami killilimmi uningatisinnaanermik allatulluunniit iliorluni nutaanik aningaasaliissutissanut inissaqartitsinissaq aserfallatsaaligassarpassuarnillu ikilisaanissamut periarfissaqarnersoq pillugu apeqquteqaat aallaavigalugu oqallittoqarnissaanik siunner-suut.**

(Inatsisartunut ilaasorta Naaja Nathanielsen, Inuit Ataqatigiit)

### **Tungavilersuut:**

Selskabit pisortanit pigineqartut innuttaasut tamat inuunerannut toqqaannartumik sunnuteqarput. Taakku tassani suliffeqartuuppata kiffartuussinerinilluunniit (nassiussat, angallanneq, oqarasuaatit, internet il.il.) atuisuuppata.

Novermbarimi 2013 Namminersorlutik Oqartussat aktieselskabiutaat pillugit ukiumoortumik nassuiaat Naalakkarsuisut tamanut agguaappaat. Tassani ilaatigut atuarneqarsinnaavoq selskabit pisortat pigisaasa iluanaarutaat ukiut tamaasa landskarsimut nakkartartut.

Naalakkarsuisut nassuiaammi allapput iluanaarummik naatsorsuinermi pingaarnertut maleruarneqartartoq illuani selskabit isumannaallisarnissaannut nutaanillu aningaasaliissutissaannut pisariaqartitsineq illuanilu aktiaatillit iluanaarutissatut naatsorsuutigisaasa oqimaaqatigiissaaaneq.

Tamatta nalunngilarput pisortat selskabiutaasa ilarpassui aserfallatsaaliinissamik ajornartorsiuteqartut tamarmillu nutaanik aningaasaliissutissanik pisariaqartitsillutik. Tamannalu ilutigalugu landskarsi aamma iluanaarutissanik atorfissaqartitsivoq.

Selskabilli piffissap ilaani iluanaarutininik akiliisussaangitsuuppata, imaluunniit iluanaarutit sumut atorneqassanersut taakku peqatigalugit aalajangerneqartuuppat, aningaasat akinik apparsaanernut, nutaanik aningaasaliissutissanut imaluunniit aserfallatsaaliinermut atorneqarsinnaagalarput.

Taama pisoqassasuuppat landskarsimut isertitassanik taakku taartissaannik ujartuisoqartariaqassaaq, aktieselskabit iluanaarutaat ullumikkut allanut atorneqartarmata. Tassani aningaasarpassuit pineqarput ajornaatsuinnaanaviannigilarlu, tamatumanili pingaarnersiutinissaq apequtaaginnarpoq.

Maannakkorpiaq pissutsit imaapput pisiassat ulluinnarni inuuniutit akitsoraluttuinnarlutik, nassiussat akitsoriartorlutik, orsussat akitsoriartorlutik, INI'p inaatai nungullarsimaqalutik polaroillu orsussaasiviisa atuuffissaat sumiiffipassuarni naammatsereersimalluni. Allattugassat taakkunanga sulii amerlanerugalarput.

Piffissami uani ajunginnerpaassappat aningaasarsiornikkut ineriartorfiunngitsumi ilimanar-

nerpaamillu kinguariartuinnarfiusussami nutaanik eqqarsarsinnaaneq pisariaqarpoq. Selskabinut, sulisorpassuarnut innuttaasunullu, aamma selskabinik piginneqataasunut, iluaqutaasumik.

Iluanaarutininik akiliinissap piffissami aalajangersimasumi unitsinnissaanut, aalajangersimasunulluunniit atorpeqarnissaanut, isumaqataaangikkaanni neriuppunga oqallinnermi uani peqataasoqassasoq qanoq ililluta selskabiutigut ineriartortissinnaanerigut aserfallakkiartuinnarnerallu unitsillugu. Ineriartornissaq ineriartortitsinissarlu isumaqatigiissutigaarput, tamatumalu qanoq anguneqarnissaa isumaqatigiissutigisinnaasariaqarlutigu.